

տոնների նման տեղի էր ունենում ուխտագնացություն հարեան խաչերը, սակայն կային առանձնապես այդ օրն այցելվող սրբավայրեր: Այսպես էր, օրինակ, Լոր գյուղի մոտ Մառաւ սրբի Օհանէսը: Արծաւանիկցիք, խնձորեսկցիք և այլ հետու և մոտիկ գյուղերի բնակիչները գերադասում էին Խորանց գյուղի Չօրէֆղոնի խաչը, որտեղ երկու շենքերում աղոթելուց և շամէ՛՛ մոմեր վառելուց հետո ներկա էին գտնվում պատարագին: Ապա նստում էին աղբյուրի մոտ ծառերի տակ մի ընդհանուր սեղանի՝ իրար հետ խառնելով բերած կերակուրները: Այդտեղ գալիս էին հատկապես այդ եկեղեցու մոտ բխող աղբյուրի ջրից⁵⁰ տուն տանելու համար: Հավատում էին, որ այդ ջուրը պահպանում էր ամեն տեսակի հիվանդություններից, արտերը՝ մորեխից, մկնիցից և կարմիր ժանգից և զորավար էր համարվում ոչ պակաս, քան թե Խուստուփի քարայրի ջուրը: Ինչպես այլ խաչերի մոտ ուխտի օրը, այստեղ էլ այդ օրը երեան էին գալիս միրգ ու վարունգ ծախողներ, աշուղներ, լարախաղացներ: Երիտասարդները ճօնջի՝ ճլորթի էին ածում, պարում էին:

Վարդավառի օրը հավատացյալները մեծ բազմությամբ դիմում էին սրբազան լեռների գագաթներին գտնված սրբավայրերի այցելության: Այնտեղ գտնվում էին հրաշագործ գերեզմաններ՝ որեւէ պարզ խաչքարով զարդարված կամ շատ նոր ժամանակներում շինված անարվեստ մատուռով հովանավորված: Բարձրանում էին Սարվարդի (Սարվարդի), Իշխանասարի (Իշխիլի) սուրբ Օհանեսը և մանավանդ Խուստուփի գագաթները: Հազիվ թե կարելի լինի երկբայել, որ ոչ թե այդտեղ իբր թե թաղված սուրբերի գերեզմաններն էին, որ գրավում էին ուխտավորներին, ինչպես և կասկածելի է նույնիսկ, թե այդ քարակույտները թաղումների հետքեր են և ոչ թե ուշ ժամանակներում հավաքած քարերի կույտեր, այլ այդ գագաթները նվիրական էին քրիստոնեության նախորդող վաղեմի դարերից սկսած և շաղկապված էին արեւի պաշտամունքի հետ և ոչ մի կապ չունեին Քրիստոսի պայծառակերպության ավանդության հետ: Վերջինը նույնիսկ Ավետարանի մեջ համարվում է ուշ ժամանակների ներմուծում: Հենց ինքն այդ ավանդությունը հավանական է հնարվել է բացատրելու համար լեռների գագաթների հեթանոսական պաշտամունքը, որը քրիստոնեության հաստատվելուց հետո էլ անխախտ մնում էր իր նախկին ուժի մեջ՝ մանավանդ Փոքր Ասիայի մի շարք շրջաններում: Ամառային արևադարձի օրերի հետ զուգորդված այդ տոնակատարությունը հետնագույն մնացորդ է այն պաշտամունքի, որն, ինչպես ամբողջ Հայկական լեռնաշխարհում, նույնպես և Զանգեզուրում պահպանվել է Վարդավառի տոնին լեռները բարձրանալու և այնտեղ առատ մատաղ բերելու կամ այս ու այն խաչի մոտ ընդհանուր հացկերույթների նստելու սովորությունների հետ: Քննելով մի այլ տեղ Վարդան, Վարդ և Վահան հատուկ անունների ծագումը, ես մատնացույց էի

⁵⁰ Չօրէֆղոնի եկեղեցին կազմված է իրար կպած երկու շենքից. առաջին դռնով մտնում էին և չորրորդով դուրս գալիս: Ամեն մի տաճարում կար սուրբ սեղան, որտեղ մոմեր էին վառում: Առաջին եկեղեցին մտնում էին շոքեշոք, մոմ վառելուց հետո վեր էին կենում, անցնում մյուս եկեղեցին: Այնտեղ մոմ վառելուց հետո դուրս էին գալիս մեջքով, ետ-ետ քաշվելով: Եկեղեցու մոտ կա մի աղբյուր, որը ոչ երաշխի ժամանակ է քանում, ոչ էլ հորդ անձրևների ժամանակ ավելանում: Դրա ջուրը սուրբ էր համարվում: Ասում էին, որ մի վարդապետ, տեսնելով, որ վանքի մոտ ջուր չկա՝ իր գավազանին կրծքով հենվել էր, գավազանը խրվել է գետնի մեջ և գոչացած ծակով ջուրը բխել է այդ գավազանի հաստությամբ: